

1 Tezalonaaika

Tezalonaaika mwaalyaraavina Poli pikariyikwia sinnawinya' yavikaryakesi.

Anga Tezalonaaika mwaalyaihi,

¹ Polinyi Saailaazalyi Timotilyi pikariyikwia da' yavikariwa. Kiraazitiyarĩ limwange'neihi kusilaanyaviyaihirina yavikariwa. Gotiyai Nimwarĩ wĩlamwaaidivĩ' Naanga Jizaazai Kiraazitiyarĩ wĩlamwaaidivĩsaihirina yavikariwesi.

Gotiyai yange'na tewaanna yihigaimwagana!
Gotiyare kwaamu'nanyabwi yihwarana!

*Tezalonaaika mwaalyara Jizaazare yagaalya'
diraginna limwagesa'nesi.*

² Yuyagaa' Gotiyari widadaanyagaa' "Su! Tezalonaaika mwaalyara gimireraavina yilaaya gimarivanigo," widadaanyi. Nabaai, yuyagaa' sariminyina Gotiyari widadaanyi. ³ Sareina nemire Gotiyai Nimwarĩ widadaa "Kiraazitiyarĩ sara limwadivisa'na tewaanyabwi sara yivanigava. Giminyi yilaaya yadaapiji a'mweraavina kale wiadaa'nyiya'na tewaanya miragiki'manigava. 'Naangei Jizaazai Kiraazitiyai walaabathelyi,' dadivĩ' yemwaaidivĩ' diraginna daa'manigava. Su! Su!" Gotiyari sara widadaanyi. ⁴ Sare' neya'mweihi nayaa dara yawi'mwo. "Gotiyari Tezalonaaika mwaalyaraavina kale wiadelyi. Nabaai

sahwaraavina ‘Ninnyarera,’ dahilakiwakelyi,” sara yawi'mwo.

⁵ Sare'na Gotiyare yagaala tewaanya' yihithonegaa' yaasiwa' yagaalya'na mi'. Aawa. Kurya Tewaanyai diraginaangei diraginyainaavi kanemwaaiha' diragina kyihitho “Yagaala nebulya yihithivanigo,” sarimi Kiraazitiyari limwage'. Sagaa' sarimi dara yawire', “Widasaabadera nemiji mwaaleva tewaanna negaimwamaniga'. Sarera neminyina neyivanigasare.” ⁶ Sareina yadaawoji sarimi avaa'ina yage'. Nabaai, Naangei yakabaabi' sarimi avaa'ina yage'. Sarimi Gotiyare yagaalya' maaresa'na kayaa'nanaanga yihye'. Sare' kiri' sarinnya munyikaavi Kurya Tewaanyai wilyihimwaaidisi gaminyina yilaaya yadivi' yagaala sa' maaresaihilyi. ⁷ Sarevidaa'nyi tewaanna yadivi' Kwaaka Maazathoniya mwaalyaraji Kwaaka Giriza mwaalyaraji Kiraazitiyareraavi sarimi tewaanna dara wijiwaainesal “O, Kiraazitiyareina sana sana yaanneina daaka!” ⁸ Sare' dare'nesi. Naangere yagaala widadaapiji sarimireba Maazathoniya yagaala sa' diwina yaka Kwaaka Giriza diwina. Gavebanyaa'ina diwiya'ne'na mi'. Aawa. Sariminyina a'mwera kadika wi'neta yuyaba dara wi'nesasi. “Tezalonaaika mwaalyara Kiraazitiyari diragina limwamanigasare.” Sara deva savina nemi yagaala pini wija'ne wawinya' mwari'. ⁹ Sare' dare'nesi. Kumi sara neminyi nedivaniga' “Sarimi Tezalonaaika mwaalyaraavi angyiri'maata kye' tewaanna yihima'mwa'daa'. Yihima'mwa'daasara

kumire kulaka ge gengiji kwaasigotiyaraaviji yagalya'maveva Gotiyari midimwa'daa'. 'Gotiya Nebulyari widayaadelyi yuyagaa' gaala mwaaidei. ¹⁰ Sigunyavidaasi Gotiyare Gawaali' walaabathe'na yemwalaana!' sara dadi'vi' Gotiyari midimwa'daa'. Gotiyare Gawaali' Jizaazalyi. Sai kabala' Gotiyai yidikaava'. Yidikaavakei 'Divi Gotiyai sahwaravina similika nuladika!' daka padaihasamaara.'" Yuyara sara nedivaniga'.

2

Anga Tezalonaaika Poli'yake'nesi.

¹ Sare' dare'nesi. Neyamweihi, sawaihi dara yawi'mwaa' "Neminyawinna Widasaabadera Apozeliyara angyiri'maata beva yagaala diraginya kanede' dinona 'Yagaala kune' mi'. Nemi midinaana!' " ² Nabaai dara yawi'mwaa' "Anga Pilipai a'mwera Apozeliyaraavi kayaa'na yeva birala wiesarera." Sagaa' daanga kanevina' kiri' sariminyawinna bona nemire Gotiyai diraginya nemwaaihakeina lika myi yona Gotiyare yagaala tewaanya' yihitho. Pwara nede' "Sabwi mujiwaakipina! Mala nayihiramaadika!" Sa'na yawirona kiri' lika myona diraginna yihitho. ³ Sare' dare'nesi. Sareina yawita kayaa'nanya' malimwagyadaa girikita'nanyabwi myadaa kwaasi myihizadaa Gotiyarina yihizawaako. ⁴ Nemi kayaa'na myo. Aawa. Gotiyai dina "Sahwaravii yaamiji mi'na a'mwe sara nimire wawinya' tewaanna yipi'de'nanyi," dakabaabi'

gamire yagaalya' damaarya'neina nemwaaiha'. Sare'na damaryadaa myawiri "A'mweraavi yilaaya wigalaana!" Aawa. "Gotiyai nemire simunya wangaderi yilaaya wigalaana!" dadaa wijiwakadaanyaine. ⁵ Sare' dare'nesi. Sariminyawinna wabwiwayagaalyasi mabyo. Yuyagaa' wabwiwayagaala myihizo. Sara yawi'mwaava. Sarimire gilyivisa maarya'na kwaasi yihithoina mi'. Wabarinnya' lika yulyarya'na yihithoina mi'. Sare' Gotiyai jalikurakivanikelyi. ⁶ Nabaai, majina "Tezalonaaika mwaalyara yawipika! 'Widasaabadera byaannakera.' A'mwe pwaraji sara yawipika!" sara maji yona yihitho. Nemi Kraazitiyare Nedasaabadeinaavina "A'mwe naangere," wija' tewaanyasi Naangereinaavine'na. ⁷ Sara mwaiihoina kiri' sariminyawi mwaalona nayaa kave yihyo. Kuvinaange' gannya kaimiraayang'i maremwaaidevaabi' nayaa kave yihyo. ⁸ Sariminyina yilaaya sara nevu'nade'na Gotiyare yagaala tewaanya' yihitho. Sare' gave'na mi'. Aawa. Sariminyina tewaanya nevu'nade'na dara do. Tezalonaaika mwaalyaraavi wigaimwagaaza'na balaade'nanyi. ⁹ Sare' dare'nesi. Neya'mweihi, nemi yawi'na "Tezalonaaika mwaalyaraavire wapaaya saza nagainadika! Aane pwai kwari taanga nujavaadika! Neminyine wapaaya sazanne nigwianna wawinya yaana!" Sara yawi'na yona Gotiyare yagaala tewaanya' yihithadaawoji tinna dara wangesa' "O, Widasaabadera, Apozeliyara wawinya naanga miraagiki'manigasara daaka! Sawisagaa'

yirikegaa' yivanigasara daaka!”

¹⁰ Sarimĩ tĩnna nengadivĩ' Gotiyalyĩ dara jalĩkurake' “Neminyĩna Wĩdasaabadera tewaanyabwi yadivĩ' yida'maraangebwi nayaa yadivĩ' yiwetawakyabwi myivanigasarera.”

¹¹ Sareina kyo yi, ganĩmaanga pwai gannya kaimĩraayangĩ nayaa yadevaaiĩ' nemĩ sarimĩjiya gazarĩzari nayaa yihyo'na yawi'mwaa'. Sarimĩre simunya tewaanna yihivaimwagana sarimĩre kuryara diraginna mwaalya'na yihithadaa diraginna dara yihizalĩkurako.

¹² Gotiyai yawi'na “Sahwaraavĩ maremwaalideinyĩ,” yawi'na yaka sarimĩnyĩ yihizivwaramaarakelyĩ. “Nĩnnya byaannyavijĩ nawi'nyaba maremwaaidĩnyavijĩ wimwaaihĩma!” Gotiyai sara yihithahĩlakakerĩna sarimĩ nayaa jamarĩla! Diraginna sara yihitho.

¹³ Sare' darevinyĩ. Sinnawĩ sagaa' Gotiyare yagaala kyihitho newi'neva myawĩrina “Yagaala a'mweraavĩnesi.” Aawa. Yagaala sa' sarimĩ maarĩna yeva yawi'na “Gotiyare yagaala nebulyasi.” Sara deva Gotiyare yagaala nebulya' warĩke'na sarimĩre simunyangĩ Gotiyai diraginna yihiziwaakivani' Kĩraazitiyarĩ limwadivĩsaihi. Sara yesa'na yĩlaaya yona yuyagaa' Gotiyari' wĩdadaanyĩ. Su! Su! ¹⁴ Sare' dare'nesi. Neya'mweihi, Kwaaka Juthiya mwaalyara Gotiyare kusĩlaanyangiyaraavĩne mĩdĩdĩvĩsaihi yĩma'ne'. Yi sahwaraavĩ kayaa'na yetabaaibĩ' pwara kayaa'na sara yihyesaihĩlyĩ. Juyara kumĩreba Kĩraazitiya Jizaazareraavĩ kayaa'na yetabaaibĩ' sarimĩre kwaakevĩ

mwaaidivisara kayaa'na yihyesaihilyi. ¹⁵ Juya sahvara Gotiyari wi'nawjiwakyasara piropetiyyaraavi tamakeva Naanga Jizaazari tamakeva nabaai neminyi neramaase'. Sare'na kumirebwi Gotiyai tinna wanganaka yilaaya mya'. Yi a'mwe yuyaraavine yikamaangere. ¹⁶ Sahvara yawi'na "Ajimya yuyangiyaraavi Apozeliyara nudipidika! Gotiyai Maaveraavi navadaihasamaaradika!" deva nede' "Diraginna yihithwo 'Yagaala sa' muji jideihilyi. Nayihiramaadika!' " Sara yadivi' a'mwe yuyaraavina yikamaangera yima'nesare. Sarera kunnya kayaa'nanya yune'na yesarera. Kiri' sareraavina Gotiyari yune'na sinna tika wida'mwakerera.

*Polì Tezalonaaika mwaalyaraavi
angyiri'maata'na yawirake'nesi.*

¹⁷ Neya'mweihì, nemì yihyagalya'mavona maalikegaa' sarimiji mamwaalyo'na sigiraayarabisaina yima'noinera. Nemì maavewi mwaidaa kiri' nemire simunya sariminyaba yuyagaa' wari'. "Sahwaraavi tinna wanganaana!" dona savina nevu'nada diraginna yaamiji yaamiji yo. Maavewi mwaihasa'na kale neyada ¹⁸ sariminyina byiri'maasa'na diraginna yaamiji yaamiji yoine. Nabaai, sarevina Polinyi gazagaasagaa' "Tezalonaaikana wima!" dena yaamiji kyo Saataani kaanya nerihidaa'nyì sariminyi myihwanganywo. ¹⁹ Sare' dare'nesi. Divi Naanga Jizaazai walaabathehaa' gaminyawì daavina yadaa nemì yilaaya beri'na yaadevaka?

Be yagaalya' widaathevaka? Naangeri
yemwaaimanigohaa' yilaaya aaihar-
avaavine'na yivanigona? Sariminyinanyira.
20 Yo, sare' dare'nesi. Gaminyawi sarimi
daavina yadaapiji nemi yilaaya yaade'nanyi.
Nabaai, "Nemi sara kyo dahaa' dava mwaaiha',"
yawirawaaji byaannakeina yima'naadeihlyi.

3

1 Sarevidaa'nyi sariminyina yawi'daa
dina "Pizi'gwa mamwalaanna!" dina
yona naarimi yilaaya'na dina "Anga
Aathenzi gaveinaai mwaalaka!" 2 Dina yola
sariminyawinna Timotiri widasaabina. Sahwai
Kiraazitiyarei neya'mwei mwaalaka Gotiyari
widaayadei Kiraazitiyare yagaala tewaanyavine
avaaiwawinyalyi. "Tezalonaaika mwaalyara
Kiraazitiyari limwadivi' kumire kuryara nayaa
mwaabi'de'naji jivaimwade'naji duziwaakya!"
widasaabina yoi. 3 " 'A'mwera kayaa'na
kyihyapiji nyagalya'mapidika! Gotiyare
diraginya' nayaa dilimwagyila!' duziwaakya!"
widasaabina yolyainaalyi. Sare' dare'nesi.
Sarimi dara yawi'mwaasa' "Kayaa'na kaneyapiji
nemi 'Wikira,' daaza'na Gotiyai nedahilakakei
daaka!" 4 Sare' dare'nesi. Sinnawi sariminyawi
mwaalongaa' dara yihitho, "Naangerina pwara
kayaa'na neyipi'de'nanyi." Sara kyihitho sara
kayaa'na yihyiwaasa' sarimi yawi'mwaa'.
5 Kayaa'na yihyiwaasavi nimi dina "Pizi'gwa
sara mamwaaimuna!" dina yena Timotiri
widasaabina. "Tezalonaaika mwaalyara
Gotiyare yagaalya' nayaa dalimwamanigava?"

dina. “Yaamiji yadei Saataani sahwaravi yaamiji yada kwaasi kudawa' kayaa'na yipija'na daaka? Nemire wawinya yaasiwa'wawinya nyima'nadika!” dena widasiwaabe.

⁶ Dahaasagaa' sariminyawidaa'nyi Timoti neminyawinna baka sariminyina yagaala tewaanya' makabina. “Sahwara Naangeri nayaa limwadiwi' pwaraavina kale wiadere,” makabina yiwa'. Nabaai nedawa' “Nemi byiri'maaro'na yawi'divi' neminyina yilaaya kuna yivaniga'. Nemi diraginna yawi'na ‘Tezalonaaika mwaalyaraavi tinna wanganaana! diraginna yawi'manigovaabi' sahwara diraginna yawi'maniga' ‘Apozeliyaraavi tinna wanganaana!’ ” Sara nedawa'. ⁷ Sare' darevinyi. Dava a'mwera kayaa'na kaneye' taanga neyivankesi. Taanga neyadaasi kiri' neya'mweihi, sarimi Naangeri nayaa limwamanigasa'na yivaimwannadaa mwaaiho. ⁸ Naangeri sarimi diraginna wilaamwaaibiza'na nemi diraginna mwaaiho'nanyi. ⁹ Sare' dare'nesi. Sariminyina kadika sara wi'nona nemire Gotiyari yilaaya naanga yivanigo. Sariminyina yilaaya naanga yivanigo'na “Su! Su! Yilaaya naanga naanga gimarivanigo,” Gotiyari diraginna widadaanyaine. ¹⁰ Sawisavi yirikevi diraginna widadaa “Tewaanyaraavi tinna wanganya'na sawinna dinemakwona! Nemi tinna dara wanganaade' ‘O, Naangeri limwadivisabwi maalina yivanigasabwi daaka! Sara dawaaji yavada'galya'na dinemakwona!” Sara widadaanyainera.

¹¹ Gotiyai Nenimaangei gami salyi nemire

Naanga Jizaazalyi sariminyawinna kaanya basamakwika! Sariminyawinna nemakwika!
 12 Naangei diraginna yihigaimwagozi sarimire simunyangi yunebanna kale'ne sabwi diraginna wakana! Sara kyoji sariminyina neminyi kale naanga neyivanikabaaibi' sariminyi Kiraazitiyare pwaraavinaji a'mwe pwaraavinaji kale naanga yihyana! Nabaai, naangave'na kale kuna yihyana! 13 Sara yoji sarimire simunya diraginna wakina kyoji divi Naangei Jizaazai gannya tewaanyaraji walaabathehaa! Gotiyai Nenimaangeryaba sarimi nayaa daavina jideihilyi. Sara kyoji yiwetawakya maayaihi tewaanaangeihi nayaa daavina jideihilyi.

4

A'mwere mwaalyabwina Gotiyai
“Nawinyabulyi,” dake'nesi.

1 Neya'mweihi, sarevidaanyi yagaala pini diraginna yihithaana! Nemi Naanga Jizaazari wilamwaalona kiwinya diraginna yihithivanigo. Sinnawisagaa' dara yihizawaako. Sara mwaalapiji sana yadivi! Gotiyari yilaaya wigaibi'delyi. Sara yihizawaakobaaibi' sara yivaniga'. Sara yivanigasaihi naanga sana sana jila! 2 Sare' dare'nesi. Naanga Jizaazai kanejwaaka' yihithonna sarimi yawi'mwaa'. 3 Sare' dare'nesi. Gotiyare simunyawbi dara yawi'mani' “Gimi nimirigi tewaanyaigi dimwala! Ata limwangebwi minna!” 4 Sara yawirapiji gazaigizaigi ginnya balaangevi tewaanna dumaaka! Yawita tewaanyajyaigi

kwala dīmaaka! “Nīmire a'mwe kwala maake mwaalika nawī'nya' gave dasi mwaalīma!” da'gizī dīmaaka! ⁵ Ajīmya yuyangiyara Gotiyari myawiryara dīka widadaa'nyiyara yaalivina maa'div+tabaaibī' kwala maaaa'dinna! ⁶ Tewaanyabwi mamarasi'ninna! Ja'mwerevī kuka maaaa'dinna! Sabwina sinnawī jalikurakya' naanga yihitho. Sabura pwara kyapjī Naangei wirivikiradelyī. ⁷ Sare' dare'nesi. Gotiyai myawiri “Sahwara ata limwangebwi yipika!” myawrya'. Aawa. “Sahwara nīmīrera tewaanyara nayaa mwaalika!” yawiraka nejīvwaramaarakelyī. ⁸ Sasarevīdaa'nyī pwai yagaala da' marasi'najai a'mweraavire yagaalya' mamarasi'nyivanī'. Aawa. Gotiyare yagaalya' marasi'nivanī'. Gotiyai sahwai gannya Tewaanyai Kuryari yanga nejaavanikerevī yagaalya' marasi'nivanikelyī.

⁹ Kale wia'nebwina Gotiyai sahwaihirī yihiziwaaka' “Saigi ja'mwerina kale gyana!” Sara kyihiziwaaka' sare'na nīmī myavikariwina! ¹⁰ Sare' dare'nesi. Sarīmireba Kwaaka Maazathoniya yuneba sirya'mweraavi yuyaraavina kale yihyivanī'. Sareihirī diraginna yihithivanigo. Gazaigizaigi kale naanga naanga gyana! ¹¹ Diraginna dara jawika! “Nīmī kave mwaalīma! Nīmire wawinya' kuna maremwaalīma! Pwaraavire wawinya' kuna mamaremwaaimuna! Wīdaasadera diraginna nyīdetabaaibī' nīnnya asasi aawawinya yīma!” ¹² “Pwara Kīraazitiyarīne mwasawinyaraavina wījīwaainya'na kaanya nayaa yamarīma! Nabaai aane piri' kirivina nanyīgainadīka!”

da'gizi ginnya asasi ja! Sara jawi'deiginyi.

Naangei walaaboz neyidikaavade'nesi.

¹³ Neyamweihi, nemi simunyavi yawi'na “Kiraazitiyarera sidu'maayara namwaaib ika! | Kiraazitiyare pwara baimwa'daasaraavina wijiwakaana! Naangeri mu'nyadivisara divi Naangei baryaraavi yidikaasa'na myemwaalyadivisaraavi kunnya baryaraavina kale wiadevaajib' Kiraazitiyareraavi kale nyadika!” Yawi'na yona sare' yavikarivanigo.

¹⁴ Sare' dare'nesi. Nemi dara limwadaanyi. Jizaazai balaka ayina dikaavakelyira. “Nebulyasi,” dovⁱdaa'nyi dara dina “A'mwera Jizaazari limwadivi' bainikeraaviji Jizaazariji Gotiyai makwalaabathere!” ¹⁵ Sare' dare'nesi. Naangei kanejiwaaka' yagaala sa' diraginna dara yih ivanigo. | Naangei walaabathehaa' nemi kwaihwaainakeina mwalaajaina baryara wa'dapiri myagalya'mayi yawaaji sinnawi myilaawi yaadeine. Arikawi. Baryara dikaavapiji sinnawi yilaawipi'derera.

¹⁶ Sare'na Naanga sahwai Sigunyavidaa'nyi waidaavada jaka naanga danganadelyi “Jikabyila!” Sagaa' ejeliya naangei jaka kudozi Gotiyare gware' makuradesira. Naangei jaka naanga kadanganoji sinnawi Kiraazitiyarera baryara dikaapi'dere. ¹⁷ Nabaai, nemi kwaihwaainakeina mwalaadeinaji saharaji sainaavi yarai nemakilaawadeinera. Sigunyavi nemi Naangeri wiji maata'na yiraayang'i nemakilaawadeinera. Sara kyoji yuyagaa' Naangeryaba mwalaade'nanyi. ¹⁸ Sare'na

pwaihiyiyari gamire baryarina kale wiadaa'nyi
wigaimwange'na yagaala da' kave duzila!

5

Naangei walaabathe'na yemwaalya'nesi.

¹ Neya'mweihi, sariminyi myavikaryaanna!
“Sagaa' yima'nadehaaki. Sana yima'nadengi.”
Sara yawisaburina mihihainywa'. ² Sare'
dare'nesi. Sahwaihi mena dara yawi'mwaa'
“Sawisavi kukeibisai Naangei yarai
walaabathehaa' yima'nadehaaki.” ³ Pwara
yawina “Dahaa' naryagaa' kwaamu'nanyagaa'
tewaanyagaakira.” Yawina yapiji navika
mwaalapijiyagaa' kayaaka yarai wigaladerera.
Yarai wigalade'na a'mwe sara likaanya
mwiyi yipi'dererera. Arikawi. Mudangegaa'
a'mwe' daanga yarai wividevaai' a'mwe
saraavi kayaaka yarai wigaladerera. ⁴ Sa'na
kiri' neya'mweihi, sagaa' yima'nadehaa'
sarimi maryaanga myipineihilyi. Jihinyaw
mamwaalyigasa'na sidu'nakeihi maryaanga myi
jideihilyi. Kukei bada a'mweraavi maryaanga
bivalakadevaai' sagaa' sidu'nakeihiri
maryaanga myihyanneihilyi. ⁵ Sare' dare'nesi.
Sarimi Baakeihi Yirikeviyaihilyi. Sarimi
Naangeregaasaihilyi. Nemi jihinnyaviyaina
mi'. Nemi sawisaviyaina mi'. ⁶ Sarevidaa'nyi
pwarabi' se wakatabaai' naraadika! Aawa.
Tinna nayaa baihanaraana! Simunya nayaa
yawiraana! ⁷ Sare' dare'nesi. A'mwera
se wa'divisara sawisagaa' se wakasare.
A'mwera biyaaya nadi' yimaka widivisara

sawisavi yimaka widivisagaaki. ⁸ Sare' nemi Naangeregaasaina mwaaihovina simunya nayaa yawiraana! Sareina Romiyara aawilasara saabya yividivi' mwaaihi'nya diraginiya mwaaihi'nadivi' malyagaa' tewaanna mwaaidivisarabisaina mwalaadeinera. Nemire saabya' Gotiyari limwadaanyabulyi. Nabaai, a'mweraavina kale wiadevulyi. Sahirisira. Nemire mwaaihi'nya diraginiya' nemi diraginna yawi'na “Gotiyai nevadaihasamaaradelyi,” yawi'na yadaa yemwaaiho. ⁹ Gotiyai maji “Saraavi maanga widima! Mala wiramima!” maji yaka newakakelyi. Aawa. Gotiyai dina “Sahwaraavire Naanga Jizaazai Kiraazitiyai padaihasamaaraderera,” dina yaka sabwi nejaavake'nanyi. ¹⁰ Kiraazitiya sahwai neminyina balakelyi. Gotiyai neminyina yawi'na “Sagaa' walaabathehaa' Kiraazitiyare pwara baihana'divisaraji kwaihwainakeraji Kiraazitiyare pwara se baidivisaraji Kiraazitiyalyi mwaaiibika!” kada' bala'. ¹¹ Sarevina gazaigizaigi yawita nawi'nya sa ja'mweri diraginna jivaimwana! Kiraazitiyareri diraginyari divada'galayivaimwana! Dahaa' yivaniginyabaaibi' sara kuna ja!

Yagaala aayannes

¹² Neya'mweihi, kiwinya diraginna yihithanganaana! Naangei sarimijiyaraavi dahilaka' “Nimireraavi nayaa dimaremwaala!” Sara kadahilaka' sahwara yihiziwaakadivi' sarimire simunya yavada'gaidivisare. Sahwara sariminyawi Naangere wawinya

yadivisa'na nayaa dara jawika! “A'mwe naangere. Nemi nayaa widaana!” ¹³ Wawinya yadivisa' yawira'gizi kuminyina yilaaya yadi dimaryawika! “Sahwara nemaremwaaidivisa' tewaanyasi.” Sareigi Naangereraavina avaaizimunya'na dimwaala!

¹⁴ Neya'mweihi, kiwinya naanga yihithaana! Sarimijiyara wawinya myadivisaraavi duziwaakya! “Yaasiwa'na namwaaidika! Wawinya ja!” Pwaraavire kuryara diraginya maayara lika yadivisaraavire kurya diraginyara dumwaaihya! Pwara simunya diraginna myawiryadivisaraavi wigaimwange'na nayaa dimaremwaala! Yuyaraavi kave ja! Nayaa duthana! ¹⁵ Da' jawika! Pwai sarimijiyari kayaa'na kyoji minya mamaranna! Minya mamaa'dinna! Aawa. Sa' diraginna jawika! Tewaanyaburi dimidina! Kiraazitiyareraavi tewaanna ja! Yuyaraavi tewaanna ja!

¹⁶ Gazagaasagaa' yilaaya ja! ¹⁷ Yuyagaa' Gotiyari duthana! ¹⁸ Pwara kayaa'na gyipijahaa' pwara tewaanna gyipijahaa' yi yuyangi “Su! Su!” Gotiyari duthana! Sare' dare'nesi. Sasareiginyi Kiraazitiyai Jizaazai gannya diraginya' kagizaavoji Gotiyai simunya sara gyawi'daany' “Nimirera nayaa yipika!” gimisana sana ja!

¹⁹ Kurya Tewaanyari myigaa'mwadinna! ²⁰ Sare' Kuryai kudozi a'mwera Gotiyare yagaala kagiziwaakapiji yaasiwa'na “Waryaanyasi,” madinna! ²¹ Aawa. Yuyangi kadika wi'na'gizi nayaa dimaryawibwaka! “Tewaanyasi,” da'gizi

dilimwagaka! ²² “Kayaa'nanya gazasa',” da'gizi dasi'nana!

²³ Gotiyai gami sai kwaamu'nanyabwi kininnakei gamireihi tewaanyaihi yuneba yihimwaaihana! Sarimire kuryaraavi sarimire simunyangi sarimire kilaakejikaavi nayaa maremwaalana! Yuyagaa' sara maremwaaida nemire Naangei Jizaazai Kiraazitiyai walaabathehaa' dara wanganade “Ya, nawi'nyarera. Yiwetawakya maayarera.”

²⁴ Sare' Gotiyai yihithahilakivanikei gazagaasagaa' tewaanyabwi yadei sana yihimwaaihadelyi.

²⁵ Neya'mweihi, neminyina Gotiyari duzila!

²⁶ Kiraazitiyarera neya'mwera yuyaraavi yilaaya yadivi' neminyine'na maangwidaayilaaya jinyila!

²⁷ Naangere diraginya'na naanna yihithima! Pikariyikwia da' neya'mwera yuyaraavi duzila!

²⁸ Yuyagaa' nemire Naanga Jizaazai Kiraazitiyai yange'na tewaanna yihigaimwagana! Gannya diraginya' yanga yihizaavana!

Poli

**Yipma Genesis and New Testament
Genesis and The New Testament in the Yipma/Baruya
language
Buk Stat na Nupela Testamen long tokples Yipma long
Niugini**

copyright © 1993, 1994 Wycliffe Bible Translators, Inc.

Language: Yipma (Baruya)

Translation by: Wycliffe Bible Translators

Video recording © The Jesus Film, a project of Cru.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

PDF generated using Haiola and XeLaTeX on 11 Nov 2022 from source files dated 9 Oct 2020

ef60f748-49e3-5ee0-8e6d-a25b74b7a93c